

BOSNA I HERCEGOVINA

Konkurencijskoviće



БОСНА И ХЕРЦЕГОВИНА

Конкуренцијски савјет

Zaključak

**o odbacivanju Prijave koncentracije
privrednog subjekta Aneks d.o.o. Banja Luka**

**Sarajevo
septembar, 2012. godine**



Broj: 05-26-1-07-12 -II/12
Sarajevo, 04.09.2012. godine

Na osnovu člana 25. stav (1) tačka e), člana 42. stav (2), a u vezi sa čl. 14. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi namjere koncentracije privrednog subjekta Aneks društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka, Bosna i Hercegovina, podnesenoj putem advokata Seada Miljkovića, Zmaja od Bosne br. 7., 71000 Sarajevo, zaprimljenoj dana 06.07.2012. godine pod brojem: 05-26-1-07-II/12, Konkurencijsko vijeće, na 41. (četrdesetprvoj) sjednici održanoj dana 04.09.2012. godine, donijelo je

ZAKLJUČAK

1. Odbacuje se Prijava koncentracije privrednog subjekta Aneks d.o.o. Banja Luka, Majke Jugovića 25, 78000 Banja Luka, Bosna i Hercegovina radi nepostojanja obaveze prijave koncentracije u smislu člana 14 stav (1) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 6.7.2012. godine, pod brojem 05-26-1-07-II/12, zaprimilo Prijavu koncentracije (u daljem tekstu: Prijava), podnesenu putem advokata Seada Miljković, Zmaja od Bosne br. 7., 71000 Sarajevo (na osnovu punomoći broj 5603/12 izdate dana 22.06.2012. godine u Banja Luci), po kojoj privredni subjekt Aneks d.o.o. Banja Luka, Majke Jugovića 25, 78 000 Banja Luka, Bosna i Hercegovina (u daljem tekstu: Podnosilac prijave ili Aneks) namjerava steći većinsku kontrolu (..)*¹ privrednog subjekta TV Kabel d.o.o. Višegrad, ul. Kralja Petra bb, Višegrad, BiH (u daljnjem tekstu: TV Kabel).

Konkurencijsko vijeće je utvrdilo da Prijava nije kompletna i uredna te je zatražilo dopunu iste aktom broj: 05-26-1-07-3-II/12 dana 31.7.2012. godine i aktom broj 05-26-1-07-8-II/12 dana 29.8.2012. godine. Podnosilac prijave je podneskom broj: 05-26-1-07-4-II/12 od 6.8.2012. godine dopunio Prijavu, podneskom broj: 05-26-1-07-6-II/12 dana 09.08.2012. godine, kao i podneskom broj 05-26-1-07-9-II/12 od 3.9.2012. godine. Konkurencijsko vijeće je dana 12.07.2012. godine aktom broj: 05-26-1-07-1-II/12 i dana 9.8.2012. godine aktom broj: 05-26-1-07-5-II/12 Regulatornoj agenciji za komunikacije (u daljem tekstu: RAK) uputilo Zahtjev za dostavu informacija na koji je odgovoreno dana 25.7.2012. godine podneskom broj: 05-26-1-07-2-II/12 i dana 27.8.2012. godine podneskom broj: 05-26-1-07-7-II/12.

Nakon kompletiranja Prijave, Konkurencijsko vijeće je, u smislu člana 30. stav (3) Zakona, dana 4.9.2012. godine Podnosiocu prijave izdalo Potvrdu o prijemu uredne i kompletne prijave broj: 05-26-1-07-10-II/12.

¹ (..) Podaci predstavljaju poslovnu tajnu

Podnosilac prijave je naveo, u smislu člana 30. stav (2) Zakona o konkurenciji (u daljem tekstu: Zakon), da nema obavezu podnijeti zahtjev za ocjenu koncentracije nekom drugom tijelu izvan teritorije Bosne i Hercegovine.

Konkurencijsko vijeće je uvidom u dostavljenu dokumentaciju utvrdilo da je prijava podnesena u smislu člana 16. stav (2) Zakona.

1. Učesnici predmetne koncentracije

Učesnici predmetne koncentracije su privredni subjekt Aneks društvo sa ograničenom odgovornošću za telekomunikacije, Banja Luka, Majke Jugovića 25, Banja Luka, BiH i privredni subjekt TV Kabel d.o.o. Višegrad, ul. Kralja Petra bb, Višegrad, BiH.

1.1. Privredni subjekt Aneks

Privredni subjekt Aneks Društvo sa ograničenom odgovornošću za telekomunikacije, Banja Luka, ul. Majke Jugovića 25, Banja Luka, Bosna i Hercegovina, registrovan je na Osnovnom sudu u Banja Luci pod brojem 1-3645-00 i u većinskom je vlasništvu privrednog subjekta Telekom Slovenije d.d. Ljubljana, Cigaletova 15, 1000 Ljubljana, Republika Slovenija (u daljem tekstu: Telekom Slovenije) sa vlasničkim udjelom od 70% dok je preostalih 30% u vlasništvu fizičkog lica (..)* ((..)*).

Privredni subjekt Aneks je postao nosilac Opšte dozvole za pružanje internet usluga 1. aprila 2002. godine te od tada počinje pružati usluge Internet pristupa. Također, nosilac je dozvole za mrežnog operatera od 12. aprila 2006. godine, a 8. maja 2006. godine postaje prvi licencirani operater fiksne telefonije u RS odnosno nosilac dozvole za javne fiksne telefonske usluge u narednih 10 godina.

Osnovne registrovane djelatnosti privrednog subjekta Aneks su djelatnost žičane komunikacije, trgovina na veliko računarima, perifernom opremom i softverima, prodaja opreme potrebne za povezivanje računarskih LAN (Local Area Network) i WAN (Wide Area Network) mreža kao i obavljanje ostalih srodnih računarskih djelatnosti vezanih za poslove planiranja i razvoja računarskih mreža.

Pripajanje privrednog subjekta ELING-KDS d.o.o. Teslić od strane Podnosioca prijave, kako se navodi u dopuni Prijave, desilo se u prvoj polovini 2012. godine.

1.1.1. Povezana društva privrednog subjekta Aneks na tržištu Bosne i Hercegovine

Privredni subjekt Telekom Slovenije je putem privrednog subjekta Aneks 100,0% vlasnik privrednog subjekta SIOL d.o.o. za pružanje telekomunikacijskih usluga Sarajevo, Tešanjaska 24a, 71000 Sarajevo (u daljem tekstu: Siol) koji je registrovan na Općinskom sudu u Sarajevu pod brojem: 065-0-Reg-11-002495.

Pretežna registrovana djelatnost privrednog subjekta Siol je proizvodnja komunikacijske opreme i trgovina na veliko i malo elektronskom i telekomunikacijskom opremom i dijelovima.

1.2. Privredni subjekt TV Kabel

Privredni subjekt TV Kabel d.o.o., Kralja Petra bb, Višegrad, Bosna i Hercegovina je registrovan na Okružnom privrednom sudu Istočno Sarajevo dana 18.1.2005. godine pod brojem: 89-01-0105-09.

Nosilac je Opšte dozvole za javnog mrežnog emitera broj DMOL-TS/090/06, Opšte dozvole za pružanje Internet usluga broj DPIU-TS/119/2011 od 22.2.2011. godine i Dozvole za distribuciju audiovizuelnih medijskih usluga i medijskih usluga radija broj 02-07-89/12 od 25.1.2011. godine.

Privredni subjekt TV Kabel je u 50% vlasništvu fizičkog lica (..)*, Zvornik dok preostalih 50% posjeduje fizičko lice (..)*.

Pretežna registrovana djelatnost privrednog subjekta TV Kabel je kablovska distribucija RTV programa.

Privredni subjekt TV Kabel nema povezanih privrednih subjekta.

2. Pravni okvir ocjene predmetne koncentracije

Konkurencijsko vijeće u postupku ocjene predmetne koncentracije primijenilo je odredbe Zakona, Odluke o utvrđivanju relevantnog tržišta («Službeni glasnik BiH», broj 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekta.

Konkurencijsko vijeće, u skladu sa članom 43. stav (7) Zakona, pri izračunu ukupnih godišnjih prihoda učesnika koncentracije je koristilo kriterije i standarde Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekta.

3. Pravni osnov koncentracije

Privredni subjekti Aneks i TV Kabel su dana 22. juna 2012. godine u Banja Luci potpisali Pismo namjere u vezi sa (..)*(u daljem tekstu: „Pismo namjere“) kojim privredni subjekt Aneks namjerava steći vlasništvo (..)* koja je u vlasništvu privrednog subjekta TV Kabel, a koju čini (..)*.

Pismo namjere je potpisano od strane (..)*.

Privredni subjekt Aneks u skladu sa Pismom namjere izražava namjeru da kupi (..)*.

4. Relevantno tržište učesnika koncentracije

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Obzirom na navedeno, a na osnovu provedene analize relevantnih tržišta učesnika koncentracije Konkurencijsko vijeće je utvrdilo da postoje dva relevantna tržišta proizvoda/usluga koncentracije i to tržište Internet usluga i tržište pružanje usluga kablovske distribucije RTV programa.

Relevantnim tržištem u geografskom smislu za pružanje Internet usluga smatra se općina Višegrad u regiji Foča (koja podrazumijeva općine Višegrad, Rudo, Foču i Čajniče) obzirom da privredni subjekt TV Kabel pruža Internet usluge samo na području općine Višegrad.

Relevantnim tržištem u geografskom smislu za pružanje usluga kablovske distribucije RTV programa smatra se općina Višegrad u regiji Foča obzirom da privredni subjekt TV Kabel pruža usluge kablovske distribucije RTV programa na navedenom području.

Slijedom gore navedenog, relevantnim tržištem predmetne koncentracije smatraju se tržišta pružanja Internet usluga i usluga pružanja kablovske distribucije RTV programa na području općine Višegrad u regiji Foča.

5. Analiza relevantnih tržišta

U analizi relevantnih tržišta učesnika koncentracije i njihovih glavnih konkurenata, kao i procjenama tržišnih udjela korišteni su kao relevantni podaci dostavljeni od RAK i podaci Podnosioca prijave.

5.1. Analiza tržišta Internet usluga

Na tržištu pružanja Internet usluga na teritoriji Bosne i Hercegovine, prema podacima dostavljenim od strane RAK-a koji se odnose na 2011. godinu, registrovano je 515.296 pretplatnika.

Privredni subjekt Aneks u 2011. godini imao je 17.862 pretplatnika, pri čemu se isti ne nalaze na području regije Foča.

Privredni subjekt TV Kabel imao je, prema podacima RAK-a, u 2011. godini 2 pretplatnika Internet usluga pri čemu su svi pretplatnici registrovani na području općine Višegrad u regiji Foča na kojoj privredni subjekt Aneks nema registrovanih pretplatnika.

Tržišni udjeli privrednog subjekta TV Kabel i njihovih konkurenata na tržištu Internet usluga u regiji Foča, u 2011. godini, iznosili su:

Tabela 1.

Red. Br.	Naziv privrednog subjekta	Broj pretplatnika	Tržišni udio (%)
1	Aneks d.o.o.	0	0,00
2	TV Kabel d.o.o.	2	0,03
3	Elta-Kabel d.o.o.	215	2,91
4	Dasto Semtel d.o.o.	553	7,50
5	Telekomunikacije RS d.d.	6.346	86,04
6	Eling KDS d.o.o.*	251	3,40
7	Lanaco d.o.o.	6	0,08
8	JODP Srpske pošte	3	0,04
9	Ukupno	7376	100,00
10	Ukupno 1+2	2	0,03
11	Ukupno 1+2+6	253	3,43

Izvor: RAK; * Eling KDS d.o.o. je tokom 2012. godine pripojen privrednom subjektu Aneks

Analizom navedenih podataka Konkurencijsko vijeće je utvrdilo da zajednički tržišni udio učesnika koncentracije na relevantnom tržištu nije veći od 40%.

5.2. Analiza tržišta kablovske distribucije RTV programa

Privredni subjekt Aneks posluje na tržištu kablovske distribucije RTV programa na tržištu Bosne i Hercegovine (s obzirom da se dozvola RAK-a za pružanje distribucije RTV programa izdaje za cijelu teritoriju Bosne i Hercegovine) i na istom je u 2011. godini, prema podacima RAK-a, imao 19.145 pretplatnika, pri čemu se isti ne nalaze na području regije Foča.

Privredni subjekt TV Kabel na tržištu u Bosni i Hercegovini je u 2011. godine imao 728 pretplatnika od čega se svi nalaze na općini Višegrad u regiji Foča.

Prema podacima Podnosioca prijave tržišni udjeli učesnika koncentracije i glavnih konkurenata na relevantnom tržištu u 2011. godini iznosili su:

Tabela 2.

Privredni subjekt	Regija Foča							
	Višegrad		Rudo		Foča		Čajniče	
	Br. pretpl.	%	Br. pretpl.	%	Br. pretpl.	%	Br. pretpl.	%
Aneks d.o.o.	0	0	0	0	0	0	0	0
TV Kabel	728	15,24	0	0	0	0	0	0
Elta-Kabel d.o.o.	0	0,00	0	0	1313	14,20	513	26,9
Total TV BH d.o.o.	700	14,65	800	19,66	1700	18,39	350	18,35
Telekomunikacije RS	300	6,28	400	9,83	800	8,65	200	10,49
Eling KDS d.o.o.*	0	0,00	0	0,00	289	3,13	0	0
Ostali	3050	63,83	2869	70,51	5144	55,63	844	44,26
UKUPNO	4778	100,0	4069	100,0	9246	100,0	1907	100,0

* Eling KDS d.o.o. je tokom 2012. godine pripojen privrednom subjektu Aneks

Na osnovu analize navedenog, a uzimajući u obzir i ukupan broj pretplatnika kablovske distribucije RTV programa na teritoriji Bosne i Hercegovine, odnosno relevantnom tržištu predmetne koncentracije proizilazi Tabela 3.

Tabela 3.

R.b.	Privredni subjekt	Bosna i Hercegovina		Regija Foča	
		Broj pretplatnika	%	Broj pretplatnika	%
1.	Aneks	19.145	4,73	0	0
2.	TV Kabel	728	0,18	728	3,64
	Ostali	384.842	95,09	19.272	96,36
	UKUPNO (1+2)	19.873	4,91	728	3,64
	UKUPNO	404.715	100,00	20.000	100,00

Izvor: Prijava koncentracije, Podaci od RAK, statistički bilteni

Analizom navedenih podataka Konkurencijsko vijeće je utvrdilo da zajednički tržišni udio učesnika koncentracije na području općine Višegrad iznosi 15,24%, odnosno na regiji Foča 3,64%.

6. Obaveza prijave koncentracije

Obaveza prijave koncentracije privrednih subjekta, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom nivou iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta, učesnika koncentracije ostvaren prodajom roba i/ili usluga na tržištu Bosne i Hercegovine, iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2011. godine iznosili su:

Tabela 3.

	Telekom Slovenije		Aneks	Siol	TV Kabel
	EUR	KM	KM	KM	KM
Svijet	(..)*	(..)*	(..)*	(..)*	(..)*
BiH	(..)*	(..)*	(..)*	(..)*	(..)*

Izvor: podaci iz Prijave *Ostvaren ukupan rashod u iznosu od (..)* KM

Godišnji prihod učesnika koncentracije predstavlja ukupan prihod (bez poreza na dodatu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterija za ocjenu koncentracija privrednih subjekata.

Analizom navedenih podataka utvrđeno je da učesnici predmetne koncentracije ne ispunjavaju uslove iz člana 14. stav (1) tačka b) Zakona jer ukupan prihod privrednog subjekata TV Kabel ostvaren prodajom roba i/ili usluga na tržištu Bosne i Hercegovine iznosi manje od 8.000.000,00 KM (Tabela 3.), a zajednički tržišni udio učesnika koncentracije na relevantnim tržištima nije veći od 40,0%, te shodno tome, isti nisu bili obavezni podnijeti Prijavu.

7. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka c) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06 i 18/11) dužan je platiti administrativnu taksu u ukupnom iznosu od 1.000,00 KM, u korist Budžeta institucija Bosne i Hercegovine.

8. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

Predsjednik

Ibrica Lakišić